

REGLUGERÐ

um ferðastyrki Tryggingastofnunar ríkisins
vegna brýnnar sjúkdómsmeðferðar erlendis.

1. gr.

Ferðastyrkur.

Sjúkratryggðir einstaklingar, sem brýn nauðsyn er að vista á erlendu sjúkrahúsi skv. 35. gr. laga nr. 117/1993 um almannatryggingar, skulu eiga rétt á ferðastyrk frá Tryggingastofnun ríkisins samkvæmt reglugerð þessari, sbr. þó reglugerð nr. 201/1998 um greiðslu læknishjálpar við glasafrjóvgun erlendis. Heimilt er stofnuninni að greiða ferðastyrk að hluta eða að fullu samkvæmt reglugerð þessari fyrir aðra sjúkratryggða einstaklinga sem af ótvíræðri nauðsyn leita sjúkdómsmeðferðar erlendis.

2. gr.

Fargjald.

Tryggingastofnun ríkisins greiðir að fullu fargjald hins sjúkratryggða, sbr. 1. gr., frá Íslandi og til þess staðar þar sem meðferð er fyrirhuguð og aftur til Íslands.

Fargjald innanlands (frá heimili sjúklings til millilandaflugvallar) skal jafnframt endurgreitt, þó þannig að sjúklingur greiði sjálfur 1.500 kr. Sé eigin bifreið notuð skal endurgreitt samkvæmt kílómetragjaldi skv. 3. mgr. 3. gr. og 6. mgr. 6. gr. reglna nr. 213/1999 um ferðakostnað sjúkratryggðra sjúklinga og aðstandenda þeirra innanlands. Fjárhæð sjúklingshluta skal fylgja hámarksfjárhæð sjúklingshluta samkvæmt 3. mgr. 3. gr. sömu reglna.

3. gr.

Fylgdarmaður.

Tryggingastofnun ríkisins greiðir ferðastyrk vegna fylgdarmanns ef sjúklingur er yngri en 18 ára, ósjálfbjarga eða mjög mikil áhætta fylgir meðferð og/eða ferðalagi. Ef aðstæður eru þannig að nauðsyn er á að heilbrigðisstarfsmaður fylgi sjúklingi greiðir stofnunin ferðastyrk vegna starfsmannsins. Að jafnaði skal einungis greiddur ferðastyrkur vegna eins fylgdarmanns en ef læknisfræðilegar ástæður krefjast þess að heilbrigðisstarfsmaður fylgi sjúklingi er heimilt að greiða ferðastyrk vegna tveggja fylgdarmanna og þá aðallega ef sjúklingur er yngri en 18 ára. Ef um er að ræða erfiða sjúkdómsmeðferð vegna lífshættulegs sjúkdóms er heimilt að greiða ferðastyrk fyrir báða foreldra (eða tvo nánustu aðstandendur) ef sjúklingur er yngri en 18 ára.

Ef sjúklingur, sem fengið hefur samþykktu fylgd, verður að dveljast erlendis a.m.k. sex vikur þá er heimilt að greiða ferðastyrk vegna skipta á fylgdarmanni á fjögurra vikna fresti.

4. gr.

Uppihaldskostnaður.

Tryggingastofnun ríkisins greiðir dagpeninga vegna nauðsynlegs uppihaldskostnaðar sjúklings erlendis utan sjúkrastofnunar svo og nauðsynlegs uppihaldskostnaðar fylgdarmanns skv. 3. gr. Greiðsla dagpeninga fer eftir sömu reglum og gilda um þjálfun, nám og eftirlitsstörf ríkisstarfsmanna á ferðalögum erlendis, sbr. auglýingu ferðakostnaðarnefndar og umburðarbréf nefndarinnar sem í gildi er á hverjum tíma. Einungis skal greiða fjórðung dagpeninga fyrir börn yngri en fjögurra ára og hálfa dagpeninga fyrir fjögurra til ellefu ára börn. Ef fylgd heilbrigðisstarfsmanns hefur reynst nauðsynleg skal hann eiga rétt á greiðslu dagpeninga í samræmi við gildandi kjarasamninga. Ef samþykktur hefur verið ferðastyrkur fyrir báða foreldra (nánustu aðstandendur) barns greiðast dagpeningar að fullu til annars foreldris en að hálfu til hins.

5. gr.

Gildistaka o.fl.

Reglugerð þessi, sem sett er með stoð í 3. mgr. 33. gr., sbr. d-lið 1. mgr. 33. gr., laga nr. 117/1993 um almannatryggingar, með síðari breytingum, öðlast þegar gildi. Frá sama tíma falla úr gildi reglur tryggingaráðs frá 16. október 1998 nr. 622/1998 um ferðastyrk sjúklinga vegna brýnnar sjúkdómsmeðferðar erlendis.

Heilbrigðis- og tryggingamálaráðuneytinu, 26. nóvember 2002.

Jón Kristjánsson.

Davíð Á. Gunnarsson.

REGLUGERÐ

um greiðsluþátttöku Tryggingastofnunar ríkisins vegna læknishjálpar á meðferðarstofnunum psoriasis- og exemsjúklinga.

1. gr.

Tryggingastofnun ríkisins skal greiða kostnað vegna psoriasis- og exemsjúklinga sem að mati sérfræðinga þurfa að leita læknishjálpar á meðferðarstofnunum psoriasis- og exemsjúklinga sem komi í stað sjúkrahúsvistar í samræmi við samninga Tryggingastofnunar ríkisins, sbr. þó reglugerð nr. 660/1998 um greiðslur Tryggingastofnunar ríkisins fyrir meðferð húðsjúkdóma, veitta af öðrum en læknum, með síðari breytingu. Tryggingastofnun ríkisins greiðir ekki kostnað við ferðir vegna meðferðarinnar.

2. gr.

Tryggingastofnun ríkisins tekur einungis þátt í kostnaði við meðferð sjúklings ef mat læknis á meðferðarþörf hefur farið fram og verið staðfest af húðlækni þess aðila sem veitir meðferðina.

3. gr.

Greiðsluþátttaka Tryggingastofnunar ríkisins takmarkast við allt að 23 skipti hjá hverjum sjúklingi á hverju meðferðartímabili.

4. gr.

Beri meðferð hér á landi ekki árangur og sjúklingi því brýn nauðsyn að vistast á erlendu sjúkrahúsi eða meðferðarstofnun getur sjúklingur sótt um greiðsluþátttöku hjá Tryggingastofnun ríkisins vegna slíkrar meðferðar samkvæmt 35. gr. laga nr. 117/1993 um almannatryggingar.

5. gr.

Reglugerð þessi, sem sett er með stoð í 3. mgr. 33. gr., sbr. 2. mgr. 33. gr., og 3. mgr. 36. gr. laga nr. 117/1993 um almannatryggingar, með síðari breytingum, öðlast gildi þegar í stað. Frá sama tíma falla úr gildi reglur tryggingaráðs frá 8. maí 1998 nr. 305/1998 um greiðsluþátttöku sjúkratrygginga í meðferð psoriasis- og exemsjúklinga.

Heilbrigðis- og tryggingamálaráðuneytinu, 26. nóvember 2002.

Jón Kristjánsson.

Davíð Á. Gunnarsson.